

**Y Pwyllgor Is-ddeddfwriaeth  
Subordinate Legislation Committee**



Cynulliad National  
Cenedlaethol Assembly for  
Cymru Wales

Bae Caerdydd / Cardiff Bay  
Caerdydd / Cardiff CF99 1NA

24 Mehefin 2008

Annwyl Gydweithiwr

**Ymgynghoriad Cyhoeddus – Gwahoddiad i ymateb**

**Y Pwyllgor Is-ddeddfwriaeth – Ymchwiliad i'r gwaith craffu ar is-ddeddfwriaeth a phwerau dirprwyedig**

Mae Pwyllgor Is-ddeddfwriaeth Cynulliad Cenedlaethol Cymru wedi lansio ymchwiliad i'r gwaith craffu ar is-ddeddfwriaeth a deddfwriaeth arall sy'n dod o fewn ei gylch gwaith. Rwy'n ysgrifennu atoch i'ch gwahodd i gyflwyno tystiolaeth i'r pwyllgor erbyn 2 Medi 2008.

Mae cylch gwaith y pwyllgor wedi ei nodi yn y Rheolau Sefydlog, sef rheolau gweithdrefnol y Cynulliad, yn Rheol Sefydlog 15. Mae'n ofynnol i'r pwyllgor graffu ar offerynnau statudol mewn ffordd "dechnegol" o dan Reol Sefydlog 15.2. Caiff y pwyllgor ymgymryd â gweithgarwch craffu ychwanegol hefyd:

- Caiff y pwyllgor, o dan Reol Sefydlog 15.3, gyflwyno adroddiad ar offerynnau statudol ar seiliau eraill, fel ei fod o bwysigrwydd gwleidyddol neu gyfreithiol (Rheol Sefydlog 15.3 (ii)); ei fod yn rhoi deddfwriaeth yr Undeb Ewropeaidd ar waith yn amhriodol (Rheol Sefydlog 15.3(iv)) neu nad yw'n gwireddu ei amcanion polisi yn berffaith (Rheol Sefydlog 15.3(v)).
- Caiff y pwyllgor, o dan Reol Sefydlog 15.6, ystyried amryw o faterion yn cynnwys pa mor briodol yw darpariaethau mewn Mesurau Cynulliad neu Fesurau Senedd y DU sy'n rhoi pwerau i wneud is-ddeddfwriaeth i Weinidogion Cymru, Prif Weinidog Cymru neu'r Cwnsler Cyffredinol - Rheol Sefydlog 15.6(ii) a chanlyniadau gorchmynion drafft o dan Ran 1 o Ddeddf Diwygio Deddfwriaeth a Rheoliadau 2006 ar gyfer deddfwriaeth sy'n ddarostyngedig i ystyriaeth yn y Cynulliad - Rheol Sefydlog 15.6 (iii).

Diben yr ymchwiliad yw adolygu'r gweithdrefnau sydd ar waith mewn perthynas â chraffu ar is-ddeddfwriaeth a deddfwriaeth arall sy'n dod o fewn cylch gwaith y pwyllgor. Bydd ymchwiliad y pwyllgor yn canolbwyntio'n benodol ar sut y dylai ymdrin â'r meysydd canlynol o'i waith a goblygiadau hynny i arferion gwaith y pwyllgor:

- craffu ar offerynnau statudol ar y seiliau a nodir yn Rheol Sefydlog 15.3:
- ystyriaethau penodol mewn perthynas ag offerynnau statudol sy'n gweithredu cyfarwyddebau Ewropeaidd;
- craffu ar Fesurau Senedd y DU sy'n effeithio Cymru.

Rydym eisiau deall gweithdrefnau presennol mewn perthynas â Llywodraeth Cynulliad Cymru yn paratoi a gwneud is-ddeddfwriaeth a throsglwyddo pwerau dirprwyedig i Weinidogion Cymru mewn Mesurau'r DU gyda'r nod o wneud argymhellion a fydd yn arwain at:

- wella rheoliadau – gwella prosesau ar gyfer paratoi is-ddeddfwriaeth a deddfwriaeth arall sydd o fewn cylch gwaith y pwyllgor gyda'r nod o wella tryloywder gweithdrefnau a chysylltiad y rheini yr effeithiwyd arnynt.
- ehangu gwaith craffu – bydd canlyniadau'r ymchwiliad yn darparu sail ar gyfer ymagwedd y pwyllgor tuag at ei gylch gwaith craffu mwy eang, a hynny er mwyn sicrhau ei fod yn craffu'n fwy effeithiol ac amserol ar reoliadau a deddfwriaeth arall o fewn ei gylch gwaith sy'n mynd y tu hwnt i waith craffu technegol.

### **Yn benodol, hoffai'r pwyllgor dderbyn tystiolaeth ar y canlynol:**

#### **1. Craffu ar offerynnau statudol ar y seiliau a nodir yn Rheol Sefydlog 15.3:**

- effeithiolrwydd ymgynghoriad y Llywodraeth â rhanddeiliaid o ran offerynnau statudol;
- sut y mae'r Llywodraeth yn gweithio gyda Llywodraeth y DU wrth ddrafftio offerynnau statudol;
- sut y gall y pwyllgor graffu ar reoliadau yn effeithiol ac yn amserol o ran eu pwysigrwydd gwleidyddol neu gyfreithiol neu eu hamcanion polisi;
- beth y gall y pwyllgor ei ddysgu gan Bwyllgor Rhinweddau Tŷ'r Arglwyddi, y mae ei gylch gwaith yn debyg i'r hyn a geir yn Rheol Sefydlog 15.3.

#### **2. Ystyriaethau ychwanegol mewn perthynas ag offerynnau statudol sy'n gweithredu cyfarwyddebau'r Undeb Ewropeaidd:**

- effeithiolrwydd a thryloywder gweithdrefnau trosi'r Llywodraeth;
- y graddau y gall y Llywodraeth deilwra'r rheoliadau gweithredu at anghenion Cymru o ran y ffiniau a bennir gan yr UE a'r graddau y mae'n gwneud hyn ar hyn o bryd.

#### **3. Craffu ar Fesurau Senedd y DU sy'n effeithio ar Gymru:**

- y gweithdrefnau sydd ar waith i egluro goblygiadau Mesurau'r DU ar feysydd o gymhwysedd datganoledig a phwerau Gweinidogion Cymru;
- sut y caiff penderfyniadau eu gwneud o ran rhoi pwerau dirprwyedig i Weinidogion Cymru, cytuno ar y gweithdrefnau perthnasol neu drosglwyddo pwerau fframwaith (pwerau i wneud Mesurau Cynulliad) o fewn Mesurau'r DU;
- cysylltiadau rhwng Llywodraeth Cynulliad Cymru a Llywodraeth y DU mewn perthynas â Mesurau'r DU;
- sut i sicrhau bod y pwyllgor yn ystyried Mesurau'r DU mewn ffordd effeithiol ac amserol.

Ceir fwy o wybodaeth ar y Pwyllgor Is-ddeddfwriaeth ar wefan y Cynulliad:

<http://www.cynulliadcymru.org/bus-home/bus-committees/bus-committees-third1/bus-committees-third-sleg-home.htm>

## Sut i ymateb i'r ymgynghoriad:

Os hoffech ymateb i'r ymgynghoriad, gofynnir i chi ystyried y canlynol:

- Dylai eich ymateb fod mor gryno ag y bo modd. Defnyddiwch y pennawd uchod fel cyfeirnod i'ch ymateb.
- Fel arfer, bydd y Cynulliad Cenedlaethol yn trefnu bod ymatebion i ymgynghoriad cyhoeddus ar gael i'r cyhoedd fedru craffu arnynt, ar wefan y Cynulliad er enghraifft, a gellir eu gweld a'u trafod hefyd mewn cyfarfodydd pwyllgor. **Os nad ydych yn dymuno cael eich ymateb a'ch enw wedi'i gyhoeddi, mae'n bwysig eich bod yn nodi hynny ar ddiwedd eich cyflwyniad.**
- Gofynnir i chi nodi a ydych yn ymateb ar ran sefydliad neu fel unigolyn.
- Gofynnir i chi nodi a fydddech yn barod i roi tystiolaeth ar lafar i'r pwyllgor.

I gyflwyno tystiolaeth, anfonwch e-bost neu ddisg os yn bosibl, neu gopi papur, at Olga Lewis, Dirprwy Clerc y Pwyllgor, y Pwyllgor Is-ddeddfwriaeth, Cynulliad Cenedlaethol Cymru, Bae Caerdydd CF99 1NA. Y cyfeiriad e-bost yw:

[legislationoffice@wales.gsi.gov.uk](mailto:legislationoffice@wales.gsi.gov.uk). Gofynnir i chi roi'r canlynol fel pennawd i'ch e-bost: *Consultation SLC – Ymgynghoriad y Pwyllgor.*

**Dylai eich cyflwyniadau gyrraedd erbyn 2 Medi 2008 fan bellaf. Anfonir derbynneb ar gyfer pob cyflwyniad. Hwyrach na fydd yn bosibl ystyried ymatebion sy'n dod i law ar ôl y dyddiad hwnnw.**

Bydd y pwyllgor yn ystyried ymatebion i'r ymgynghoriad ysgrifenedig yn ystod tymor yr Hydref 2008.

Os bydd gennych unrhyw gwestiynau ynglŷn â'r ymgynghoriad, gwaith y pwyllgor neu broses ddeddfu'r Cynulliad ac ati, mae croeso i chi gysylltu ag Anna Daniel, y Clerc, ar 029 2089 8144, neu Olga Lewis, y Dirprwy Clerc, ar 029 2089 8154.

**Dr Dai Lloyd AC**  
**Cadeirydd**

Swyddfa Ddeddfwriaeth Gwasanaeth Seneddol y Cynulliad / APS Legislation Office  
Ffôn / Tel 02920 89 8154  
E-mail [Legislation.comm@wales.gsi.gov.uk](mailto:Legislation.comm@wales.gsi.gov.uk)

Croesewir gohebiaeth yn y Gymraeg a'r Saesneg  
We welcome correspondence in both English and Welsh